

**Təntən sagı tə, Polə nə púpúní
 v pa
 Timote
 nə
 Timote təntən sagı tə yuu
 wa sugu**

Lìù tə, v nə púpúní sagı kv tə

Kv yı *tuntunv Polə nə púpúní kv. Máná tə wa, v nə púpúní kv, də v yı v wulə bən diè wa Rómə nə.

Lìù tə nə, Polə nə púpúní

Sagı kv tə yı təntən sagı tə, Polə nə púpúní v pa Timote nə. Timote nyına tà *Zwifə, v nuu ga yı Zwifə. D jigə *Kərisə lìù, v ga yı Polə karbiu. Timote jigə Polə twaduən tə wa lìù don, v yà nə swə zənzən. Yìèn yà nə wulə Kərisə lià púlé tə wa, Polə yàá tun wá lá nə, sə v va v ywàn tə yuu. Polə pın wá nii, sə v ya Efezə nə, v dàn Kərisə lià tə jìàn də v kàrì ba.

Sagı tə wa sugu

Efezə *Kərisə lià tə yı ba tə wulə ba tanu ba tiàn. Yá Kərisə lià duən də wulə ba kàrì kunkun yìèn. Polə púpúní kv, v ma bırı Timote nə kwìè tə, v nə mɛ, sə v pa Efezə Kərisə lià tə də ba yàá tiàn tə nə.

Polə pià v bırı Timote də, v mɛ, sə v ja cígá kàrà tə v waa con. D mɛ, sə v twá Yı sagı tə wa sùràn tə nii nə, ndə kv nə mɛ nətɔ. D mɛ, sə v tun suywájú tə tótɔnan tə wuuu, v dàn

ká yá. D me, sɛ ʋ kwɛn Kɛrisɛ lià púlí tɛ, ʋ kɛ
cwɛŋɛ nɛ, ʋ ga kúrí yáá tìán nɛzɛŋɛ.

*Polɛ jònì Timote
(Titɛ 1.1-4)*

¹ À mù Polɛ yí Zwezi-*Kɛrisɛ *tɔntɔnu. À mù
nɛ púpúní sagí kv tɛ. Yí jon nɛba nɛ cuna wa.
Zwezi-Kɛrisɛ dɛ pɪn nɛ jɛ yala. Yá ʋ mù nɛ pɪn
nii, sɛ à ya ba tɔntɔnu. ² À púpúní sagí kv tɛ,
à pɪn n mù Timote nɛ, n nɛ yí ndɛ à biú nɛ
cígá cígá, n nɛ keni n waa Zwezi nɛ tɛ yí.
Nɛ nyina Yí dɛ nɛ *Yuu-Tiu Zwezi-Kɛrisɛ nɛ
wá fwa pubwanu n yíra. Ba mù nɛ wá dɛri n
yinɛgɛ zɛnzɛn, ba ga pa mú bɪcan sié.

*Á cia á tìán nɛ dɛ kɔnkɔn karnyina-ba tɛ
(1 Timote 6.3-5; Titɛ 3.9; Galasi tìán 3.10-
12, 19-24)*

³ Mánjá tɛ, à nɛ vɛli Masedwanɛ nagwanaa, à
pɪn mú kwìè, sɛ n yà Efɛzɛ nɛ, n cì lià duɛn nɛ,
ba dàn ká bɪri kɔnkɔn kàri. ⁴ Kv mù tɛntɛ kwa
nɛ, sɛ n tɛ cì ba nɛ, ba dàn ká jɛlɛ tɛ yomanan
tɛntɛ mancɪn tɛtɛ. Tɛ yí yìɛn tɛ, tɛ nɛ ba dɛn
jɛ. Tɛ duɛn dɛ ga yí ba nɪbara-ba tɛ yìɛn tɛ
twara, tɛ nɛ wàri tɛ gálì tɛ zwèe. Tɛ mù yìɛn
tɛntɛ yà tútúná cɪcɪ nɛ, tɛ yáá zìn, tɛ ga ba
saŋa, sɛ Yí fira tɛ tun dɛ ba. Ba wáá Yí fira
tɛntɛ ba lwarɪ, dɛ ba nɛ ken ba waa Zwezi nɛ.
⁵ Yoo tɛ yí, n nɛ me, sɛ n swìn kv nɛtu tɛ ba
con, kv mù nɛ yí, sɛ ba wání ba sóní duɛn. Ba
sonu tɛntɛ me, sɛ kv ya dɛ bɪcan nɛpon, kv nɛ
ba pubɔnkɔkwɪnan jɛ, sɛ kv pa ba nɛ keni ba
waa Zwezi nɛ tɛ ya cígá cígá. ⁶ Lià duɛn jén ba

tìàn, ba kùò ba tē yìèn tǎntǎ fwa. Yá ba nē jén tǎ dàñ nē pɪn, ba jǎ tǔtǔnǎ, tǎ nē ba nywarɪ jǎ. ⁷ Ba pià, sǎ ba ya Yɪ *nii tǎ, ɔ nē pɪn *Moyizǎ nē dǎñ, ba bɪrɪ lià nē. Yá ba ga yǎrɪ ba tǎtǎ sùràn tǎ dǎñ, ba nē swìn. Ba yǎrɪ yìèn tǎ dǎñ, ba nē kàrɪ tǎ yoo dǎ dǎn, ndǎ ba yǎé tǎ.

⁸ Nǎ yǎé dǎ, Yɪ nii tǎ zìèn, dǎ ba nǎ ja ku ba tɔŋa, ndǎ ku nǎ mǎ nǎtɔ. ⁹ Ku mù yɪrɪ, ba mǎ, sǎ ba lwarɪ dǎ, Yɪ nii tǎ tà ɔ pɪn lià tǎ yɪrɪ, ba nǎ yɪ cígá tián. Á nǎŋǎ lǎzwǎnyirǎ tǎ, Yɪ nǎ pɪn ɔ nii tǎ ba yɪrɪ: Ku mù nǎ yɪ wɔlɔnyɪna, dǎ lià tǎ, ba nǎ ba Yɪ nii zìlí, dǎ lià tǎ, ba yáá nǎ tǎlé dǎ Yɪ, dǎ cɔna lià. Yɪ pɪn ɔ nii tǎ lià tǎ yɪrɪ, ba ba Yɪ yìèn tǎ zìlí, dǎ ba tǎ, ba nǎ zɔnɪ ɔ mù Yɪ cwǎŋǎ tǎ, dǎ ba tǎ yɪrɪ, ba nǎ gwɪ ba ninǎ dǎ ba nyɪna, dǎ lagɔra yɪrɪ. ¹⁰ Yɪ pɪn ɔ nii tǎ lià tǎ yɪrɪ, ba nǎ pǎni duǎn vǎe vǎe, dǎ bara tǎ yɪrɪ, ba nǎ ba kan pià, ba ga pià bara duǎn, ba ma fwa ba kana, dǎ ba tǎ yɪrɪ, ba nǎ janɪ lià ba yoli. Yɪ pɪn ɔ nii tǎ lià tǎ mama yɪrɪ, ba nǎ yɪ kɔnkɔna, dǎ ba tǎ yɪrɪ, ba nǎ swìn kɔnkɔn yìèn. Yɪ pɪn ɔ nii tǎ lià tǎ mama yɪrɪ, ba nǎ tɔŋa yìèn tǎ, tǎ nǎ zɪga ɔ cígá kàrà tǎ nǎ. ¹¹ Kàrà tǎntǎ dǎ sɔywǎŋú tǎ yɪ nǎdɔ. Sɔywǎŋú tǎntǎ nan Yɪ con. Yá ku mù nǎ bɪrɪ ɔ pupwǎn tǎ, dǎ ɔ dun tǎ. Yá Yɪ tǎntǎ nǎ ken sɔywǎŋú tǎntǎ yoo à jìàn wa, sǎ à swìn ku à bɪrɪ.

*Yɪ pubwanɔ tǎ, ɔ nǎ fwa Polǎ yɪra
(Tɔtɔnan 26.9-20; 1 Timote 6.12, 20-21; 2
Timote 2.15-18)*

¹² À kǎni nǎ *Yuu-Tiu Zwezi-*Kǎrisǎ lǎeǎe. Ɖ bún dǎ, à yɪ liù tǎ, ɔ nǎ wǎá à yuu wa ɔ jǎlǎ,

sə à tun v tutuŋi tə də pùé nədʊ, v ma kúrí nə, sə à tun kv. D dǎn pɪn nə diàn, sə à ma tun kv tutuŋi tǎntə. ¹³ Mǎŋá don yɪn lá, à nə twɪn v mù Zwezi tǎntə. À fɪfɪn v Kərisə lià tə, də à kəni càn ba nə. Də kv nətʊ tə mama, à yinəgə zənzən jɪn wá. Ləyəri yà nə pɪn, à fwa kv nətʊ tə, à ga wà cígá pɪn Zwezi nə də. ¹⁴ Yá nə Yuu-Tiu dǎn fwa pubwanʊ à yɪra, kv nə dáá zənzən, kv ja lɛ. À keni à waa v nə wuuu, à dǎn ga jə Zwezi-Kərisə sonu tə. ¹⁵ Kv tə à nə pià, sə à swɪn yəbə, kv ya sugʊ tə, kv nə yɪ cígá. Lià tə mama nə mɛ, sə ba sɛe kv. Zwezi-Kərisə twi tia yuu, sə v jon lià ba cuna wa. À mù ga nə yɪ ba yáá tíú, à cuna nə dwə ba, v nə jon. ¹⁶ Yá Zwezi-Kərisə dǎn dəri à mù liù tə, à cuna nə dáá tə doni ba duən, tə yinəgə zənzən. Kv mù nə pɪn, v twá də nə, sə v ma bɪrɪ v pínú tə nə yɪ nətʊ. D bɪrɪ kv, sə v ma dǎn lià tə, ba nə wá kə ba waa v nə, jìàn, sə ba ga na mi tə, kv nə ba zwèe v con.

¹⁷ À pià, sə lià tə pa dun Yɪ nə, ba ga bu v nə, mǎŋá də mǎŋá, kv nə ba zwèe. Yɪ nə yɪ piú tə, v pàrɪ tə nə ba zwèe, abada. D mù nə ya Yɪ tə, v nə wulə mǎŋá mama wuuu, yii nə wàrɪ wá kv nɪ, v ga yɪ v ciɪ də. Amɪna!

¹⁸ À biù Timote, à pià, sə à swɪn n con, sə n tun n pa Yɪ nə, ndə Yɪ nii *sùsùnà tə dun nə swɪn n yoo nətʊ. N dǎn piì n líí Yɪ nii sùsùnà tə sùràn tǎntə yoo, sə n tun Yɪ tutuŋi tə zəni zəni, ndə n nə pià, sə n jan jaŋa, ka nə ziən. ¹⁹ N jaŋa tǎntə wa, n tə mɛ, sə n kə n waa Zwezi nə wuuu. N pubuŋa tə ga wà mɛ,

sə ka ya pubunkukwɪɒn. Lià duən dɒɡv ka ja pubunzəŋə təntə yoo vən nə. Kɪ m̀ nə pɪn, ba yà dí yáá, ba kə ba waa Zwezi nə. Yá kɪ nə yí yáá, ba kúv̀ ba ba waa kəni Zwezi nə. ²⁰ Kɪ m̀ ləzwənyirə təntə wa, lià duən nə yɪ Yimene də Aləkəzandərə. À ken ba m̀ lià təntə *Sɪtana jìàn wa, sə ba ma lwarɪ swian, ba kúv̀ dàn ká twɪn Yɪ.

2

Nətv tə, ba nə jònì Yɪ (Ebərə-ba 2.9)

¹ Təntən yoo tə à nə kwè, sə ba fwa, kɪ m̀ nə yɪ, sə *Kərisə lià tə jɒn Yɪ, sə ba lòrì Yɪ, sə ba kə Yɪ lèèè, lià tə mama yuu yɪrɪ. ² Ba lòrì Yɪ, ba pa pèégá tə nə, sə ba lòrì Yɪ, ba pa lià tə nə, ba nə ywàŋá ba lɒv tə yuu, sə ba lɒv tə wànì kɪ zùrì, sə sɪé ya kɪ wa. Kɪ nətv wá san, sə nə wànì nə zìlí Yɪ, nə ga twá wá zəni. ³ Mə kɪ m̀ yoo təntə nə ywán, kɪ ga zɪən, kɪ pa Yɪ nə, v nə jon nəba nə cuna wa. ⁴ Mə v m̀ nə pià, sə v jon lià tə mama ba cuna wa. Kɪ nə sùrí lá, sə v pa ba lwarɪ v cígá tə. ⁵ Yɪ yɪ nədv, yá ləzwəndva nə wulə v m̀ Yɪ də ləzoni pwərə wa. Kɪ liù təntə nə yɪ Zwezi-*Kərisə. ⁶ D m̀ nə pɪn v tiàn, sə v tɪ ləzoni tə mama yuu yɪrɪ, sə v ma jon ba, ba cuna wa. Kɪ m̀ yoo təntə nə bɪrɪ, kɪ máná tə tətə wa, də Yɪ pià, sə v jon ləzoni mama. ⁷ Mə kɪ m̀ yɪrɪ nə, Yɪ tún nə, sə à ya v *tɒntɒnv, à swɪn v svɡv tə. À m̀ nə mɛ, sə à gwɪn Yɪ svɡv tə dèñ à bɪrɪ lià tə nə, ba nə tà *Zwifə-ba, sə ba kə ba waa Zwezi

nə, sə à bırı ba cígá tə də. À bırı ku cígá təntə
lìà tə nə, ba nə tà Zwifə-ba. Ku tà kunkun nə à
kuni, ku ya cígá nə à swìn.

*Bara də kana nə me, sə ba ya nətɔ Kərisə
lìà jérə wa*

*(1 Piyerə 3.1-6; 1 Korəntə tìán 14.34-35;
Titə 2.3-5)*

⁸ À dān pià, sə bwálí mama nə, sə bara tə jun
Yi. Ba nə zìn ba jìàn yi nə, sə ba ma jun Yi,
ba me, sə ba ya lià tə, Yi nə ti ba. Lɔɔ wà
me, sə tə ya ba bicanɔ wa. Tútóná də wà me,
sə tə ya ba pubuɔa wa. ⁹ À swə, sə kana tə də
zɔ ganan, ndə kan nə me, sə ɔ zɔ ɔ gànù nətɔ.
Ba dān ká zɔ ganan tə, tə nə ba zìən də ba. Tə
wà me, sə tə ya jɔjə tìán ganan. Ba dān ká pan
yun tə yiri nə yi jɔjə tìán nə panɔ. Ba dān ká
nàn ba tìán də síán bian zanan, nə à yèé ganan
tə, tə kwənə nə dáá zənzən. ¹⁰ Ba bwanwiən
dān me, sə tə ya ka tun zəni. Ku mù nə me də
kana tə, ba nə swìn də, ba mù zìlí Yi. ¹¹ Kàrà
tə máɔá wa, kana tə me, sə ba cuɔv kàrà tə
sənbwen, sə ba sèe kàrà tə nii. ¹² À ba nii pɔn
kan nə, sə ɔ kàrà bara tə, nə à yèé, sə ɔ ja
dìàn ba yuu wa. Kana tə me, sə ba pú ba níé,
ba jèñ sənbwen. ¹³ Ku dèñ nə yi Yi təntən, ɔ
fwa Adamə. Ku kwa nə, ɔ fwa Evə. ¹⁴ Yá ku
tà Adamə nə, *Sıtana gɔgarɔ, ku yi kan tə nə,
ɔ gɔgarɔ. Ku nətɔ dān pià ku bırı də, kan nə
vɔga Yi nii tə. ¹⁵ Yá də ku nətɔ mama, Yi wá
jon kan ɔ cuna wa, ɔ nə lɔrɔ bia tə yiri. Yi wá
jon wá, də ɔ nə keni ɔ waa Zwezi nə wuuu, də

υ nə swə là, də υ nə twá Yıı nə zəni, də υ nə jə υ tiàn zəni.

3

Kərisə là púlí yuu tiàn (Titə 1.5-9; 1 Piyerə 5.1-4)

¹ Səgv kv tə, à nə pià à swìn, kv ya cígá. Liù tə, υ nə pià, sə υ ya *Kərisə là púlí yáá tiàn yuu tíú, kv tíú pià tətənzəŋu. ² Kərisə là púlí yáá tiàn yuu tíú wà mε, sə υ ja yokukwınan, ba nə wá caga υ nii nə tə yırı. D mε, sə υ ya kan nədv bart. D mε, sə υ ya liù tə, υ nə buja zəni. D mε, sə υ ya liù tə, υ nə buja zəni. D mε, sə υ ya liù tə, υ nə tuja yièn tə, ndə kv nə mε, sə tə tən nətv. D mε, sə υ ya liù tə, υ nə sèe υ joŋə vərə zəni, υ pa ba zırı υ diè wa. D mε, sə υ ya liù tə, υ nə wàá là υ kàrì zəni. ³ D wà mε, sə υ nywìn swana zənzən υ bubunı. Nə à yèé, sə υ ya jarıdırv. D dahn mε, sə υ ya liù tə, υ nə yı bwàbwà. D wà mε, sə υ ya tətənyan. Nə à yèé, sə υ sóní səbiu. ⁴ D mε, sə υ dí yáá υ kwen υ tətə diè tə zəni, sə υ bia tə wàní ba sèe υ nii, ba ga zılı υ tətə cígá cígá. ⁵ Də liù nə wàrì υ tətə diè υ kwen, nətə nə υ wá fwa, υ ma kwen Kərisə là púlí tə mù? ⁶ Á nə pià, sə á kúrí Kərisə là púlí yáá tiàn yuu tíú, á dənà ká kúrí liù tə, υ nə ken υ waa Zwezi nə dura. Á nə kúrí liù nətv, υ wá fwa fwiə, yá Yıı bürà tə wá ja wá, ndə ka nə jın *Sıtana nətv. ⁷ Kərisə là púlí yáá tiàn yuu tíú mε, sə là tə, ba nə tà Kərisə là, də tətə swìn υ yozəŋə yoo. Kv nə tà

nətv, kv wàá kv pɪn ba goni wá. Yá cavira wá zu wá, Sıtana ga twá kv nə, v ma ja wá.

Kərisə lià púlí tətònà yoo

(Tutunan 6.1-6; 1 Korəntə tián 4.2)

⁸*Kərisə lià púlí tətònà də mə, sə ba ya lià tə, lià nə mə, sə ba zilí ba. Ba ga mə, sə ba ya cígá cígá lià. Ba wà mə, sə ba nyu swana zənzən, ba ga wà mə, sə ba twá yokukwɪnan nə, ba ma na səbiu. ⁹ Ba mə, sə ba pa cígá sugu tə nə, kv nə sègè, Yu nə birɪ ba, də pubuɲa tə, ka ziən. ¹⁰ Á nə pìà, sə á kúrí Kərisə lià púlí tətònà, kv mə, sə á dí yáá dédén ba, á na kv tə, ba nə yɪ. Də ba nə ba yokukwɪnan jə, lià nə wá swɪn tə yoo, sə á dàń zɪɪ lá, á kə ba Kərisə lià púlí tutunan tə wa. ¹¹ Kərisə lià púlí tətònà tə kana mə, sə ba ya kana tə, lià nə zilí ba. Ba wà mə, sə ba ya lià tə, ba nə swɪn yolwana, ba pɪn lià nə. Ba mə, sə ba ya kana tə, ba nə buɲa zəni. Ba mə, sə ba ya kana tə, ba nə yɪ pùé nədv tián yoo mama wa. ¹² Kərisə lià púlí tətònà mə, sə v ya kan nədv barɪ. D mə, sə v wàní v tətə bia tə, də v tətə diè tə v kə cwəɲə nə zəni. ¹³ Kərisə lià púlí tətònà tə, ba nə tuɲa zəni, ba wá na dun bwálí. Ba ga wá wàní ba swɪn Zwezi-Kərisə sugu tə, də ba cígá mama, ba nə keni ba waa v nə tə yɪɪ.

Yoo nəfarv, kv nə sègè

(Efəzə tián 2.19-22; Zwan 1.1, 14; Romə tián 1.4; 16.25-26)

¹⁴ Á púpúní sagɪ kv tə n nə, à ga jə yala də, à wá bà à na mú, máɲá mancɪn wa. ¹⁵ Də à

nə dán à wà twi, sə n twá sagı ku tə nə, n ma lwarı nətv tə, n nə mə, sə n ya Yı bia tə wa. Yı bia təntə nə yı *Kərisə lià púlí tə, ku nə yı Yı tə, v nə wulə mı wa, nə ti. Kərisə lià púlí təntə nə zıɲa sɔɡv tə, ku nə yı cíɡá, ndə yonjı nə zıɲa dəyuu nətv.

¹⁶ Cíɡá tə, ka nə sègè ku yoo təntə wa, ka dèñ lù zənzən. Liù mama wàri ku yoo təntə, v tútùní. Ku mù nə yı Zwezi-Kərisə, v nə jigə ləzwənə. Yı-*Siɲu tə biri də, v yı cíɡá tíú Yı yáá con. *Malıke nı wá. Lià swın v sɔɡv tə, ba biri luv dwíé tə mama nə, Lià keni ba waa v nə, tia yuu wa. Yı ti wá, v kə v con dun bwálí wa.

4

Kunkun karnyina-ba yoo

(1 Zwan 4.1-3; Kolosə tián 2.16-23)

¹ Yı-*Siɲu tə cíɡá swın də, talıkwa máɲá tə wa, lià duən, ba nə ken ba waa Zwezi nə, wá piı ba yá wá. Ba dán wá piı ba zılı *zinə nii, ba ga wá twá tə mù zinə tə kàrà nii nə. ² Ba wá dɔɡv ba tián ba pa níé bələ tián, ba nə yı kunkuna, ɟıgarı ba, ba ga pa ba jén. Ba mù kunkuna təntə pubɲa tə tıga míámíán, ndə gantwan nə dí mən. ³ Ba mù nə kàri ba biri də, ku culi, sə kan də bæ swe duən nə. Ba ga biri də, ku culi, sə lià dé wodirən duən də. Tə mù wiən təntə ga yı Yı fwa, sə ba dé. Lià tə, ba nə ken ba waa Zwezi nə, ba ga yèé cíɡá tə, ba nə ken Yı lèèè, ba ga dé tə, ku ba yolwan mama jə.

⁴ Wiən tə mama, Yı nə fwa ziən. Won mama

tələ, ba nə mε, sə ba li ba dugv, də ba nə jon tə mama, ba ga kə Yı lèèèè tə yırı. ⁵ Yı sɔgv tə də yıjɔnti tə yàá pa won mama zıən, kv pa Yı nə.

*Zwezi-Kərisə tutvzəŋu yoo
(2 Timote 2.14-16; 4.1-2, 5)*

⁶ N mε, sə n kàrì yìèn tə tə, n bıri là tə nə, ba nə yı n nubıa Kərisə yırı. Kv nətı wá pa, n ya Zwezi-*Kərisə tutvnbıu nəzəŋu. Kv ga wá bıri də, n pın cıgá Yı sɔgv tə nə, n ga twá kv nə zəni. N nə keni n waa kv nə, də kàrà nəzəŋu tə nə. Yá kv tə bıri də, sùràn tə də kàrà nəywáŋú tə saŋa mú, tə pa n vèli yáá wuuu, Yı cwəŋə tə wa. ⁷ Dugv ləyerən yomanan tə, tə nə tà Yı nyıən. ⁸ Də liù nə fwa diàn won, kv yàá pa v yıra ja diàn, kv ga wá san wá mancın mancın. Yá v nə twá Yı cwəŋə tə mù nə zəni, kv mù saŋa wá zənzən kv dwıən. Kv wá pa v na mı nədɔn síún nə. Kv mı təntə ga wá ya mı tə, kv nə ba zwèe Yı con. ⁹ Kv mù sɔgv təntə yı là tə mama nə mε, sə ba sèe kv, ba pa ba tiàn nə. ¹⁰ Mə kv mù nə pın, nə ma tuŋa də nə jaŋa. Yá nə ken nə yala Yı tə nə, v nə wulə mı wa. D mù nə pià, sə v jon là tə mama ba cına wa. D mù nə wá jon là tə mama, ba nə ken ba waa Zwezi nə,

¹¹ Kv mε, sə n pa nii tə yìèn təntə yırı, sə n ga kàrì tə mama n bıri. ¹² Dàn ká sèe n pa, ba mun mú, n nə yı ləzwəndɔn tə yırı. N mε, sə n pa ba twá n tətə nə, ba ma lwarı nətı tə, ba nə mε, sə ba ya. Kv nətı tə wá twá n sɔgv nə, də nətı n nə yı nə. Kv wá twá n nə swə

lìa nɛtv nɛ, dɛ n nɛ keni n waa Zwezi nɛ wuuu nɛtv, dɛ nɛtv tɛ, n bɪcan nɛ yɪ nɛpon Yɪ yáá con. ¹³ Kàrí Yɪ sɔgv tɛ mánjá mama wuuu, lìa tɛ yáá con, dɛ n pɪn ba kwìè, dɛ n bɪrɪ ba. Fwa nɛtv kv jɛ vɛlɛ dɪn tɛ, à nɛ wá bà. ¹⁴ Dàn ká gwìèn tarpɪvn tɛ, Yɪ nɛ pɪn mú. Yɪ pɪn mú tarpɪvn. Tɛntɛ kv twá Yɪ nii *sùsùnà tɛ sùràn nɛ, ba nɛ swìn n yuu wa. Kərisə lìa púlí yáá tián tɛ ga tún ba jìàn n yuu wa kv yɪrɪ. ¹⁵ Kə n diàn mama lá, sɛ n wàní tvn kv tvtvɔɪ tɛntɛ, n pa kv nii sú. Fin n yía kv yuu zəni, sɛ lìa tɛ mama na dɛ, n yɪ n vɛli n yáá wuuu, Yɪ nyiən tɛ wa. ¹⁶ Cɪ n tiàn nɛ, sɛ n cì kv tɛ, n nɛ kàrí tɛ dɛ nɛ. Ja pínú wuuu, n dàn ká pìi n kə kwa. Dɛ n nɛ fwa kv nɛtv, kv wá pa Yɪ jon mú n cɔna wa, v ga twá mú v jon ba tɛ, ba nɛ cɔga n sɔgv tɛ.

5

Nɛtv tɛ, n nɛ mɛ, sɛ n ya Kərisə lìa tɛ yáá con

(1 Korɛntɛ tián 7.34-35)

¹ N nɛ wulɛ dɛ bazɔv, v nɛ fwa yoo, kv nɛ wà mɛ, dàn ká caga v nii nɛ dɛ diàn. N mɛ, sɛ n kwè wá bwàbwà, ndɛ v yà nɛ yɪ n nyɪna nɛ. Kwè balandɔra tɛ, ndɛ ba yà nɛ yɪ n nubɪa nɛ.

² Dɛ kazɔv nɛ fwa yoo, kv nɛ wà mɛ, sɛ n kwè wá, ndɛ ba yà nɛ yɪ n ninɛ nɛ. Kwè kaninɛ tɛ, ndɛ ba yà nɛ yɪ n nakwana nɛ, n ga pa n bɪcan ya nɛpon ba yáá con.

³ Zilí kadənɛ tɛ, ba cígá nɛ yɪ ba cɪcɪ, sɛ n ga ywàń ba yuu. ⁴ Kadənu tɛ, v nɛ jɛ bɪa, nɛ à yèé nìán, ba mù nɛ mɛ, sɛ ba dí yáá ba ywàń ba diè

lìa tē yuu. Ba mε, sē ba tūn kv tē, ba nē mε, sē ba tūn ba pa ba lìa tē nē, sē ba ma kē ba lèèè. Mē yoo tētē nē Yū swē. ⁵ Kadēnu don wulē, v nē yī kadēnu cīgá cīgá, v nē wulē v cīcī, v ga ba liù mama jē, sē v ywàñ v yuu. D mù kadēnu tētē yàá kē v yala Yū nē. D yàá jùnì Yū tītīn dē yīcav, v lòrì, sē Yū san wá. ⁶ Yá kadēnu tē mù, v nē fwa v fira cīcī, dē v wulē mī wa tē mama, v yī ndē v tīga Yū yáá con. ⁷ Nēñ kv tē n nē mε, sē n pa nii ba kv yuu wa, sē yìèn dàn ká ya ba yīra, lià nē wá caga ba nii nē tē yīrī. ⁸ Dē liù nē ba v dwíí tìán nē saṅa, nē à yèé kv tē, kv nē dwē, v ba v diè lià tētē nē saṅa, kv tíú vīga Zwezi. D mù liù tētē waa līṅa kv dwēn liù tē, v nē wà v waa ken Zwezi nē.

⁹ Dàn ká púpúní kadēnu yīrī n sūrī kadēnē tē nē, á nē saṅa ba nē tē nii nē, dē v nē ba bīna sapwītwa jē. Kv sūrī lá, dē v barī nē wà nēdv yīn. ¹⁰ Kadēnu mε, sē v ya liù tē, ba nē bwī v tutunzēṅē nē. D mε, sē v ya liù tē, v nē ywàñ v bīa yuu zēni, v ga sēè, v jōṅē vērē zēni v pa, ba zūrī v diè wē. D mε, sē v ya liù tē, v nē sūn* lià tē, ba nē yī *Kērisē nē tī, nēè. D mε, sē v san lià nē, ba nē wulē càn wa, v ga tūn tutunzēṅē, máná mama. ¹¹ Dàn ká púpúní kadēnē tē, ba nē yī kanīnē, tē mù yīra kadēnē yīra sagī tē wa. N nē púpúní ba yīra lá, máná tē wa, barī swīu fira nē jē ba, ba wá dūgv Zwezi-Kērisē lá. Yá ba ga va ba swe barī nē. ¹² Ba yà fwa ndē ba twá Zwezi-Kērisē nē, ba ga pīi ba yá

* **5:10** 5.10 *Zwifē-ba con, ba yàá pa ba sūn vee nēè, sē ba ma bīrī dē, ba sēè wá ndē ba vee nē ba diè wa.

wá. Ku mù nè pɪn, Yɪ bùrà tɛ wá ja ba. ¹³ Ku nè sùrí lá, ku wá pa, ba jì yayɪnyɪna, ba twá dii wa ba vɛli. Yá ku ga bá ya ku cɪcɪ. Ba wá ya sɪfaru tián. Lìà duən yìèn nè wá pìí tɛ jɛ ba bɪan nè, ba ga wá swìn sùràn tɛ, ba nè wà mɛ, sɛ ba swìn. ¹⁴ Ku mù nè pɪn, à pìà, sɛ n yá kadənə tɛ, ba nè yɪ kaninə tɛ, sɛ ba pìí ba swe, ba lɔrɪ bia, sɛ ba ywàń ba diè yuu nè zəni. À ba pìà, sɛ nè duŋa twá ba nè, ba ma swìn yokukwɪun mama nè yuu wa. ¹⁵ Kadənə duən dí yáá ba duŋu Zwezi cwəŋə tɛ, ba pìí ba va ba twá *Sɪtana nè. ¹⁶ Kan tɛ, ɪ nè yɪ *Kərisə liù, nè jɛ kadənə ɪ dwíí wa, ɪ mù nè mɛ, sɛ ɪ san ba. Ɖ wà mɛ, sɛ ɪ pa ba jì Kərisə lià púlí tɛ yuu zɪlɪ. Kərisə lià púlí tɛ mɛ, sɛ ku san kadənə tɛ nè, ba cígá nè ba liù jɛ míámíán.

(1 Korəntə tián 9.7-14)

¹⁷ Á mɛ, sɛ á pa ŋwírán dəkurən bɛlə Kərisə lià púlí yáá tián tɛ nè, ba nè tɔŋa zəni, ba swìn Yɪ sɔŋu tɛ, də ba kàrì ku ba bɪrɪ tɛ, á doni. ¹⁸ Yɪ sɔŋu tɛ swìn, ku wú: «Máná tɛ wa, n nè jɛ nau, n ma tɔŋa n fɔɔ, ku wà mɛ, sɛ n vwa ku nii nè, ku dàn ká dɪŋɪ wobɪa tɛ». Ku kúbù swìn ku sùrí lá, ku wú: «Tùtònù mɛ, sɛ ɪ na ɪ ŋwírán».

¹⁹ Də liù nè swìn, ɪ ma zɪga Kərisə lià púlí tɛ yáá tíú tɛ don nè, dàn ká cɔŋu ku tíú sɔŋu, də ba nè wà lià bɛlə də batwa yí, ba nè zɪga yáá tíú tɛ nè. ²⁰ Caga lià tɛ, ba nè tɔŋa cɪna tɛ, nii nè Kərisə lià púlí tɛ mama yáá con, sɛ ku pa, fən zɪ ba duən tɛ, ba dàn ká tɔn tɛ yiri.

²¹ À pɪn mú nii ku tɛ, də Yɪ də Zwezi-Kərisə

də *malıke tə, υ nə kúrí, sə n zílí kv tə, à nə swìn n con, tə nii zəni. Dàn ká kúrí kv vàn don n dɔgv. Dàn ká kúrí là tə, n ma tɔn kv. ²² Dàn ká bıbarı n tún n jìàn liù yuu wa, sə n pa wá tɔtɔɣı Kərisə là púlí tə wa. Də n nə wà n tìàn nə cì, n wá twá n tɔn cɔna tə. Cı n tìàn nə, sə n ya liù tə, n bıcan nə yı nəpon.

²³ N kúò dòn ká nyu níá cıcı. N dòn nyu diven† mancın mancın, n pùé yayıgv tə, də n yayıran tə duən tə yırı, sə tə zwèe.

²⁴ Là duən cɔna ba sègè míámíán. Də ba nə swə, ba wà kv tìàn bùrà bùrì də. Ba duən cɔna yı ba bùrà tə bùrì kwa nə, nə ba dòn yáa na tə. ²⁵ Tɔtɔnzəgə tə də ba sègè míámíán. Yá tɔtɔnzəgə tə, nə wàrì tə nı yii wa, də tətə wàrì tə sègè, tə me lá.

6

(Efexə tìàn 6.5-8; 1 Piyerə 2.18-20)

¹ Là tə mama, ba nə yı ywəgə, me, sə ba zílí ba liù tə, υ nə yè ba zənzən, sə kv pa liù mama dòn ká twın Yı, υ dòn ká swìn yolwan nə kàrà tə yuu wa. ² Ywəgə tə, ba tìàn nə yı *Kərisə là tə, ba wà me, sə ba mun ba, ba mù də ba nə yı Kərisə là tə yırı. Ywəgə təntə dòn me, sə ba kwen ba tɔn ba pa ba tìàn təntə nə, ba doni ba dí yáa tə. Là təntə, ywəgə tə nə tɔɣa ba pın ba də yı ba nubıa Kərisə yırı, Yı ga swə ba.

*Kvkvkòn kàrì tə, də cígá cígá jıjə tə yoo
(Romə tìàn 16.17-18; Ebərə-ba 13.5)*

† **5:23** 5.23 Kv yı swana yiri don, kv nə wáá pùé yayıgv kv ywarı.

³ Nèń, kv tə n nə mε, sə n kàrì, sə n kwè là tə. Liù don wulə, v nə kàrì kàrà yiri don. D mù liù təntə wà cígá pɪn nə *Yuu-Tiu Zwezi-
 *Kərisə cígá sùràn tə nə, v ga wà cígá pɪn nə kàrà tə nə, ka nə bɪrɪ Yɪ nə swə, sə liù ya nətɔ.
⁴ Kv tíú yɪ fwiə nə jə wá, v ga yèrì won mama. D yənu nə yɪ tútùná, v ma dɪ jara yìèn yira boŋu yuu wa. Tə mù nə yàá pa v zɪga là duən nə, kv tián wiən yɪrɪ. D jə tútùná, v dɔ tjaja là dèń nə, v ga buŋa yolwan v pɪn là nə. ⁵ Ba yàá dɪ tútùná wuuu ba pwərə wa, ba pubuŋa tə ba zìèn, ba ga kúv yèrì cígá tə. Ba pubuŋa wa nə, ba buŋa də, ba nə twá cwəŋə tə nə zəni, ba wá na səbɪa. ⁶ Kv yɪ cígá də, liù nə twá Yɪ cwəŋə tə nə zəni, v yɪ jtjə tíú, də v nə poli v pùé də kv tə, v nə jə. ⁷ Nə wà won mama ja bà lɔv wa, nə ga bá wàní won mama nə ja víí. ⁸ Kv mù nə pɪn, nə nə na nə nii wodiu, nə ga jə ganan, nə mε, sə nə pa, tə cɪcɪ mε nəba. ⁹ Là tə, ba nə pià, sə ba na wiən zənzən, ba yàá pa *Sɪtana yigu ba, v kə yìèn wa, ndə ba nə zva nyalɪ wa. Kv dàn yàá pa ba sóní wokukwɪnan tə, tə nə cùgà là tə. Yá tə mù nə yàá cùgù ba míámíán. ¹⁰ Yokukwɪnan yiri mama dəkuu nə yɪ ka sóní səbiu. Là duən lɪ ba tiàn Zwezi cwəŋə tə wa, ba pià səbɪa zənzən. Ba dí càn zənzən kv yoo təntə yɪrɪ, kv ga yɪ ba tətə nə pià tə, ba pa ba tiàn nə.

*Sagɪ tə yígúré sùràn
 (2 Timote 2.3-7; 4.7-8)*

¹¹ N mù liù tə, n nə yɪ Yɪ liù, lɪ n tiàn tə mù yìèn tə mama wa. Kə n diàn mama, sə

n wàní n tún ku tè nè yí cígá yìèn. Twá Yú cwəŋə tè nè zəni, sə n kə n waa Zwezi nè, mánǎ mama wuuu. Sóní lià tè, sə n ja pínú, sə n ja pubwanv. ¹² Púrí n yíra, n kə n waa Zwezi nè wuuu. Kə diàn, sə n wàní n ya muu tè wa, ku nè ba zwèe Yú con. Mə ku mù yíri nè, Yú kúrí mú. Mánǎ tè, Yú nè kúrí mú, n tətə swìn cígá sugu lià kapupu yáá con də, n ken n waa Zwezi nè. ¹³ Zwezi-*Kərisə tətə diin zigi, v swìn cígá sugu tè *Pilata yáá con, v ga biri də, v mù wulə cígá cwəŋə wa. À dǎn pín mú nii ku tè, də Yú tè, v nè pín muu won mama nè, də v mù Zwezi-Kərisə. ¹⁴ Twá à sùràn tè nii nè, à nè dí yáá à swìn n con. Dàn ká dwá tè nii nè, dàn ká fwa won tè, lià nè wá swìn, ba zigi n nè ku yíri. Ya nətəv ku ja vələ, nè *Yuu-Tiu Zwezi-Kərisə nè wá píi v bà. ¹⁵ Yú tè, v nè yí pupwən tíú, li mánǎ v tún, sə v pa Zwezi-Kərisə píi v bà ka wa. D mù Yú nè yí diàn mama Yuu-Tiu. D mù nè ya pèegá tè mama píú, v ga yí yun tiàn tè mama Yuu-Tiu. ¹⁶ D mù Yú cici nè wulə mánǎ mama wuuu, v ba ti. D wulə poni wa, liù mama nè wàri ku poni tè yíra v boli. Liù mama yii tè wà v mù Yú ni. Liù ga wàri wá n ni də. D mə, sə ba bu v nè, v mù nè jə diàn, tè nè ba zwèe abada. Amuna!

*Nətəv n nè mə, sə n kwè jje tiàn tè
(Likə 12.15-21; 2 Timote 1.14)*

¹⁷ Pa nii lià tè nè, ba nè yí síún luv ku tè jje tiàn, sə ba dǎn ká fwa fwiə. Ba dǎn ká kə ba waa luv jje wa, ka nè wá le síún síún. Ba mə, sə ba kə ba waa Yú nè. D mù nè pín won

mama búrí nēba, sē nē jwē. ¹⁸ Swìn ba con, sē ba tún zēni, sē ba jǵē tē ya tutunzēgē jǵē. Ba mē, sē ba pa wiēn lià nē dē ba bicanı mama, sē ba tārì ba jǵē tē dē lià duēn. ¹⁹ Dē ba nē fwa nētı, ba wiēn tē, tē kwēnē nē dáá, tē dē wá ya jǵē nēzēgı Yu con, ka nē wārì ka cùgà. Yá ba dān wá na mu tē, ku nē yı cígá, Yu con.

²⁰ À biú Timote, ywán ku tē, Yu nē pın mú, yuu zēni. Ja n tìàn, dān ká dı tütúná tē, tē nē yı tutı, tē nē tà Yu nyiēn. Dān ká kē n nii yìēn tē wa, ba nē wú, dē tē yı yēnu yìēn, tē ga yı kunkun yìēn. ²¹ Lià duēn yà bún dē, ba jē ku yēnu tētē. Ku mù nē pın, ku tìán kúò ba ba waa kēni ku tē nē, nē nē ken nē waa ku nē.

Yu nē wá fwa pubwanı á yıra.

Yu sɔywáŋó sagɪ
Nuni, Southern: Yu sɔywáŋó sagɪ New Testament
Le Nouveau Testament en Nun

copyright © 1999 Wycliffe Bible Translators, Inc.

Language: Nuni, Southern

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 22 Sep 2022 from source files dated 8 Feb 2022

d18530a7-7259-5f23-92b6-70e3abe5f3fa